

四庫全書

子部

欽定四庫全書

子部  
說郛卷六十九上

詳校官庶吉士<sub>臣</sub>陳若霖

員外郎<sub>臣</sub>牛稔文覆勘

總校官編修<sub>臣</sub>倉聖脉

校對官檢討<sub>臣</sub>蕭九成

謄錄監生<sub>臣</sub>李本

欽定四庫全書

說郛卷六十九上

元 陶宗儀 撰

歲華紀麗譜

費著

成都遊賞之盛甲於西蜀蓋地大物繁而俗好娛樂凡  
太守歲時宴集騎從雜沓車服鮮華倡優鼓吹出入擁  
導四方奇技幻恠百變序進於前以從民樂歲率有期  
謂之故事及期則士女櫛比輕裘袷服扶老携幼闐道  
嬉游或以坐具列于廣庭以待觀者謂之遨床而謂太

守為遨頭宋朝以益州重地嘗謀帥以命宋公祁宰相  
對曰蜀風奢侈祁喜遊宴恐非所宜宋朝不從卒遣之  
公先奉詔修唐書因以書局自隨自成都每宴罷盥漱  
闢寢門垂簾燃二椽燭媵婢夾侍和墨伸紙望之者知  
公修唐書若神仙焉嘗宴於錦江偶微寒命索半臂諸  
婢各送一枚公視之慮有厚薄之嫌訖不服忍冷以歸  
舊俗傳誇以為談本田公况賞為成都遨樂詩二十一  
章以紀其實而薛公奎亦作何處春游好詩一十章自

號薛春游以從其俗且欲以易尹京之舊稱

公知開府專以嚴治

人謂之薛出油

此皆可以想承平之遺風也至清獻公為記乃

曰曩時宴會皆牙校掌之蓋榷酤之利有餘人樂於為役公帑歲入七慮千萬貫有奇自新法頒行酒坊為官所鬻牙校雖得券錢不足自贍乃者議置成都市易務方游觀時人情懼然減常歲之半及浣花後始開罷去乃復朋聚游江今公使錢歲給三萬貫常廩廩慮不足譬之巨人以狹衾寢覆趾則露肩擁左則闕右甚可笑

也今盤饌比舊從省樂優之給亦復過殺設遂廢之則非天子所以付畀一隅惠保遠人之意而小民之鬻肴果者但營慕供藉以為養此游宴之不可廢也觀公此言則蜀人之貧富欣戚可以知政矣今以元日為始而第其事

正月元日郡人曉持小綵幡遊安福寺塔粘之盈柱若鱗次然以為厭禳懲咸平之亂也塔上燃燈梵唄交作僧徒駢集太守詣塔前張宴晚登塔眺望焉

二日出東郊早宴移忠寺

舊名碑  
婁院

晚宴大慈寺清獻公

記云宴罷妓以新詞送茶自宋公祁始蓋臨邛周之純  
善為歌詞嘗作茶詞授妓首度之以奉公後因之

五日五門蠶市蓋蠶叢氏始為之俗往往呼為蠶叢太  
守即門外張宴

上元節放燈舊記稱唐明皇上元京師放燈燈甚盛葉  
法善奏曰成都燈亦盛遂引帝至成都市酒于富春坊  
此方外之言存而勿論咸通十年正月二日街坊點燈

張樂晝夜喧闐蓋大中承平之餘風由此言之則唐時  
放燈不獨上元也蜀王孟昶時間亦放燈率無定日宋  
開寶二年命明年上元放燈三夜自是歲以為常十四  
十五十六三日皆早宴大慈寺晚宴五門樓甲夜觀山  
棚變燈其飲散之遲速惟太守意也如繁雜綺羅街道  
燈火之盛以昭覺寺為最又為錢燈會會始於張公詠  
蓋燈夕二都監戎服分巡以察姦盜既罷故作宴以勞  
馬通判主之就宣詔亭或涵虛亭舊以十七日今無定



日仍就府治專以宴監司也

二十三日聖壽寺前蠶市張公詠始即寺為會使民鬻農器太守先詣寺之都安王祠奠獻然後就宴舊出萬里橋登樂俗園亭今則早宴祥符寺晚宴信相院

二十八日俗傳為保壽侯誕日出竿橋門即候祠奠拜次詣淨衆寺郊國社丞相祠奠拜畢事會食晚宴大智院

二月二日踏青節初郡人遊賞散在四郊張公詠以為

不若聚之為樂乃以是日出萬里橋為綵舫數十艘與  
賓僚分乘之歌吹前導號小游江蓋指浣花為大游江  
也士女駢集觀者如堵晚宴於寶歷寺公為詩有曰春  
游千萬家美人顏如花三三兩兩映花立飄飄似欲乘  
烟霞公鐵心石腸乃賦此麗詞哉後以為故事清獻公  
為記時綵舫至增數倍今不然矣八日觀街藥市早宴  
大慈寺之設廳晚宴金繩院

三月三日出北門宴學射山既罷後射乃蓋張伯子以

是日即此地上升巫覡賣符於道遊者佩之以宜蠶辟  
災輕裾小蓋照爛山阜晚宴于萬歲池亭泛舟池中九  
日觀街藥市早晚宴如三月八日二十一日出大東門  
宴海雲山鴻慶寺登衆春閣觀摸石蓋開元二十三年  
靈智禪師以是日歸寂邦人敬之入山遊禮因而成俗  
山有小池士女探石其中以占求子之祥既又晚宴于  
大慈寺之設廳二十七日大西門睿聖夫人廟前蠶市  
初在小市橘田公以禱雨而應移於廟前太守先詣諸

廟奠拜宴于衆淨寺晚宴大智院寒食出大東門早宴  
移忠院晚宴大慈寺設廳曩時寒食太守先設酒饌於  
近郊祭鬼物之無依者謂之遙享後置廣仁院以葬死  
而無主者乃遣官臨祭之而民間上塚者各儀集於郊  
外大僖二年趙公稹嘗開西樓亭榭俾士庶遊觀自是  
每歲寒食闢園張樂酒壚花市茶房食肆過于蠶市士  
女從觀太守會賓僚凡決旬此最府廷遊宴之盛近歲  
自二月即開園踰月而後罷酒人利於酒息或請於府

展其日月府尹亦許之

四月十九日浣花佑聖夫人誕日也太守出笮橋門至  
梵安寺謁夫人祠就宴于寺之設廳既宴登舟觀諸軍  
騎射倡樂導前沂流至百花潭觀水嬉競渡官舫民船  
乘流上下或幕帟水濱以事遊賞最為出郊之勝清獻  
公記云往昔太守分遣使臣以酒均給遊人隨所會之  
數以為斗升之節自公使限錢茲例遂罷以遠民樂太  
平之盛不可遽廢以孤其心乃以隨行公使錢釀酒界

之然不逮昔日矣

五月五日宴大慈寺設廳醫人鬻艾道人賣符朱索綵  
縷長命辟災之物筒飯角黍莫不成在

六月初伏日會監司中伏日會職官以上末伏日會府  
縣官皆就江瀆廟設廳初文潞公建設廳以伏日為會  
避暑自是以為常早宴罷泛舟池中復出就廳晚宴觀  
者臨池張飲盡日為樂趙清獻公使限錢但為初伏會  
今因之

七月七日晚宴大慈寺設廳暮登寺門樓觀錦江夜市  
乞巧之物皆備焉十八日大慈寺散孟蘭盆宴于寺之  
設廳宴已就華嚴閣下散

八月十五日中秋玩月舊宴于西樓望月于錦亭今宴  
于大慈寺

九月九日玉局觀藥市宴監司賓僚于舊宣詔堂晚飲  
于五門凡二日官為幕帟棚屋以事游觀或云有恍惚  
遇仙者

冬至節宴于大慈寺後一日早宴金繩寺晚宴大慈寺  
清獻公記云至前一日太守領客出北門石魚橋具樽  
豆觀樵已乃即天長觀晚宴蓋文潞公始為之後復罷



荆楚歲時記 宗懔

正月一日是三元之日也春秋謂之端月雞鳴而起先

於庭前爆竹以辟山臊惡鬼

埤按御覽引作山魃

按神異經云西方山中有人焉其長尺餘一足性不  
畏人犯之則令人寒熱名曰山臊以竹著火中爇燂  
有聲而山臊驚憚玄黃經所謂山獬鬼也俗人以爲  
爆竹起於庭燎家國不應濫於王者

長幼悉正衣冠以次拜賀進椒栢酒飲桃湯進屠蘇酒

膠牙飴下五辛盤進數于散服却鬼丸各進一雞子造桃板著戶謂之仙木凡飲酒次第從小起

按四民月令云過臘一日謂之小歲拜賀君親進椒酒從小起椒是玉衡星精服之令人身輕不老栢是仙藥成公子安椒華銘則曰肇惟歲首月正元日厥味惟珍蠲除百疾是知小歲則用之漢朝元正則行之桃者五行之精厭伏邪氣制百鬼也董勛云俗有歲首用椒酒椒花芬香故采花以貢樽正月飲酒先

小者以小者得歲先酒賀之老者失歲故後與酒周  
處風土記曰元日造五辛盤正元日五薰鍊形五辛  
所以發五藏之氣莊子所謂春月飲酒茹蔥以通五  
藏也數于散出葛洪煉化篇方用栢子仁麻仁細辛  
乾薑附子等分為散井華水服之又方江夏劉次卿  
以正旦至市見一書生入市衆鬼悉避劉問書生曰  
子有何術以至於此書生言我本無術出之日家師  
以一丸藥絳囊裹之今以繫臂防惡氣耳於是劉就

書生借此藥至所見鬼處諸鬼悲走所以世俗行之其方用武都雄黃丹散二兩蠟和令調如彈丸正月旦令男左女右帶之周處風土記曰正旦當生吞雞子一枚謂之練形膠牙者蓋以使其牢固不動今北人亦如之熬麻子大豆兼糖散之案練化篇云正月旦吞雞子赤豆七枚辟瘟氣又肘後方云旦及七日吞麻子小豆各二七枚消疾疫張仲景方云歲有惡氣中人不幸便死取大豆二七枚雞子白麻子酒吞

之然麻豆之設當起於此梁有天下不食葷荊自此  
不復食雞子以從常則

帖畫雞戶上懸葦索於其上插桃符其傍百鬼畏之

按魏議郎董勛云今正臘旦門前作烟火桃神絞索  
松栢殺雞著門戶逐疫禮也括地圖曰桃都山有大  
桃樹盤屈三千里上有金雞日照則鳴下有二神一  
名鬱一名壘并執葦索以伺不祥之鬼得則殺之應  
劭風俗通曰黃帝書稱上古之時兄弟二人曰荼與

鬱住度朔山上桃樹下簡百鬼鬼妄捐人援以葦索  
執以食虎于是縣官以臘除夕飾桃人垂葦索虎畫  
于門效前事也

又以錢貫繫杖脚廻以投糞掃上云令如願

按錄異記云有商人區明者過彭澤湖有車馬出自  
稱青洪君要明過厚禮之問何所須有人教明但乞  
如願及問以此言答青洪君甚惜如願不得已許之  
乃其婢也既而送出自爾商人或有所求如願並為

即得後至正旦如願起晚乃打如願如願走入糞中  
商人以杖打糞掃喚如願竟不還也此如願故事今  
北人正月十五日夜立于糞掃邊令人執杖打糞堆  
云云以答假痛意者亦為如願故事耳

正月七日為人日以七種菜為羹翦綵為人或鏤金薄  
為人以貼屏風亦戴之頭鬢又造華勝以相遺登高賦  
詩

按董勛問禮俗曰正月一日為雞二日為狗三日為

羊四日為豬五日為牛六日為馬七日為人正旦晝  
雞于門七日帖人於帳令一日不殺雞二日不殺狗  
三日不殺羊四日不殺豬五日不殺牛六日不殺馬  
七日不行刑亦此義也古乃磔雞今則不殺荆人於  
此日向辰門前呼牛羊雞畜令來乃置粟豆於灰散  
之宅內云以招牛馬未知所出翦綵人者人入新年  
形容改從新也華勝起於晉代見賈充李夫人典戒  
云像瑞圖金勝之形又取像西王母戴勝也舊以正



旦至七日諱食雞故歲首唯食新菜又餘日不刻牛  
馬羊狗豬之像而二日福施人雞此則未喻郭緣生  
述征記云壽張縣安仁山宋東平王鑿山頂為會人  
日望處刻銘於壁文字猶在老子云衆人熙熙如登  
春臺楚詞云目極千里傷春心則春日登臨自古為  
適但不知七日竟起何代晉代桓溫叅軍張望亦有  
正月七日登高詩近代以來南北同耳北人此日食  
煎餅於庭中作之云薰火未知所出

立春之日悉翦綵為鷩戴之帖宜春二字

按宜春二字傳咸鷩賦有其言矣賦曰四時代至敬  
逆其始彼應運於東方乃設鷩以迎至翬輕翼之岐  
岐若將飛而未起何夫人之工巧式儀形之有似御  
青書以贊時著宜春之嘉祉

正月十五日作豆糜加油膏其上以祠門戶先以楊枝  
挿門隨楊枝所指仍以酒脯飲食及豆粥挿箸而祭之  
按續齊諧記曰吳縣張成夜起忽見一婦人立於宅

東南角謂成曰此地是君家蠶室我即此地之神明  
年正月半宜作白粥泛膏其上以祭我當令君蠶桑  
百倍言絕而失之成如言作膏粥自此後大得蠶世  
人正月半作粥禱之加肉覆其上登屋食之呪曰登  
高縻挾鼠腦欲來不來待我三蠶老則是為蠶逐鼠  
矣石虎鄴中記正月十五日有登高之會則登高又  
非今世而然者也

其夕迎紫姑以下將來蠶桑并占衆事

按劉敬叔異苑云紫姑本人家妾為大婦所妬正月十五日感激而死故世人作其形迎之呪云子胥不在云是其壻曹夫人已行云是其姑小姑可出於厠邊或豬欄邊迎之捉之覺重是神來也平原孟氏嘗以此日迎之遂穿屋而去自爾著以敗衣蓋為此也洞覽云帝嚳女將死云生平好樂至正月可以見迎又其事也俗云溷厠之間必須靜然後致紫姑雜五行書廁神名後帝異苑云陶侃如廁見人自云後帝

著單衣平上憤謂侃曰三年莫說貴不可言將後帝之靈憑此姑而言乎

正月夜多鬼鳥度家家槌牀打戶捩狗耳滅燈燭以禳之

按玄中記云此鳥名姑獲一名天地女一名隱飛鳥一名夜行遊女好取人女子養之有小兒之家即以血點其衣以為誌故世人名為鬼鳥荊州彌多斯言信矣

正月木日夜蘆荳火照井廁中則百鬼走

元日至月晦並為酺聚飲食士女泛舟或臨水宴樂  
按每月皆有弦望晦朔以正月初年時俗重以為節  
也玉燭寶典曰元日至月晦今並酺食度水土女悲  
湔裳酹酒於水湄以為度厄今世人唯晦日臨河解  
除婦人或湔裙

春分日民並種戒火草於屋上有烏如烏先雞而鳴架  
架格格民候此鳥則入田以為候

社日四鄰並結綜會社牲醪為屋於樹下先祭神然後饗其胙

按鄭氏云百家共一社今百家所社綜即共立之社也

去冬節一百五日即有疾風甚雨謂之寒食禁火三日造餽大麥粥

據厯合在清明前二日亦有去冬至一百六日者琴操曰晉文公與介子綏俱亡子綏割股以啖文公文

公復國子綏獨無所得子綏作龍蛇之歌而隱文公求之不肯出乃燔左右木子綏抱木而死文公哀之令人五月五日不得舉火又周舉移書及魏武明罰令陸翹鄴中記並云寒食斷火起於子推琴操所云子綏即推也又云五月五日與今有異皆因流俗所傳據左傳及史記並無介子推被焚之事案周書司烜氏仲春以木鐸循火禁于國中注云為季春將出火也今寒食準節氣是仲春之末清明是三月之初



然則禁火蓋周之舊制陸翹鄴中記曰寒食三日醴酪又煮粳米及麥為酪擣杏仁煮作粥玉燭寶典曰今人嘗為大麥粥研杏仁為酪引錫沃之孫楚祭子推文云干飯一盤醴酪二盂是其事也

鬪雞鏤雞子鬪雞子

按玉燭寶典曰此節城市尤多鬪雞卵之戲左傳有季邱鬪雞其來遠矣古之豪家食稱畫卵今代猶染藍茜雜色仍加雕鏤遞相餉遺或置盤俎管子曰彫

卵然取之所以發積藏散萬物張衡南都賦曰春卵  
夏筍秋韭冬菁便是補益滋味其闕卵則莫知所出  
董仲舒書云心如宿卵為體內藏以據其剛髣髴闕  
理也

打毬鞦韆施鉤之戲

按劉向別錄曰蹴鞠黃帝所造本兵勢也或云起於  
戰國案鞠與毬同古人蹋蹴以為戲也古今藝術圖  
云鞦韆北方山戎之戲以習輕趨者施鉤之戲以綆

作蔑纜相冒綿亘數里鳴鼓牽之求諸外典未有前  
事公輸子遊楚為舟戰其退則鈎之進則強之名曰  
鈎強遂以時越以鈎為戲意起於此湮盤經曰鬪輪  
骨輪索其鞞韃之戲乎鞞韃亦施鈎之類也

三月三日士民並出江渚池沼間為流杯曲水之飲

按續齊諧記晉武帝問尚書摯虞曰三日曲水其義  
何指答曰漢帝時平原徐肇以三月初生三女而三  
日俱亡一村以為怪乃相攜之水濱盥洗遂因流水

以濫觴曲水起於此帝曰若此談便非嘉事尚書郎  
東哲曰摯虞小生不足以知此臣請說其始昔周公  
卜成洛邑因流水以汎酒故逸詩云羽觴隨波流又  
秦昭王三月上巳置酒河曲有金人自東而出奉水  
心劍曰令君制有西夏及秦霸諸侯乃因其處立為  
曲水二漢相沿皆為盛集帝曰善賜金十五斤左遷  
摯虞為陽城令按韓詩云唯溱與洧方洹洹兮唯士  
與女方秉蘭兮注謂今三月桃花水下以招鳧續鳧

祓除歲穢周禮女巫歲時祓除霽浴鄭注云今三月  
上巳水上之類司馬彪禮儀志三月三日官民并禊  
飲於東流水上彌驗此日南岳記云其山西曲水壇  
水從石上行士女臨河壇三月三日所逍遙處周處  
吳越注吳地記則又引摯虞三女並以元巳日死故  
臨水以消災所未詳也張景陽洛禊賦則洛水之遊  
傅長虞神全文乃園池之宴孔子云暮春浴乎沂則  
水濱禊祓由來遠矣

是日取鼠麴汁蜜和粉謂之龍舌料以厭時氣

四月中有鳥名獲穀其名自呼農人候此鳥則犁耙上岸

按爾雅云鴈鵠鵠鞠郭璞云今布穀也江東呼獲穀

崔寔正論云夏扈趣耕鋤即竊脂玄鳥鳴獲穀則其

夏扈也

五月俗稱忌月多禁忌曝牀薦席及忌蓋屋

按異苑云新野庾實嘗以五月曝席忽見一小兒死

在席上俄失之其後實子遂亡或始於此或問董勛  
曰俗五月不上屋云五月人或上屋見影鬼便去勛  
答曰蓋秦始皇自為之禁夏不得行漢魏未改案月  
令仲夏可以居高明可以遠眺望可以升山陵可以  
處臺榭鄭玄以為順陽在上也今云不得上屋正與  
禮反敬叔云見小兒死而禁暴席何以異此乎俗人  
月諱何代無之但當矯之歸于正耳

五月五日四民並蹋百草又有鬪百草之戲採艾以為

人懸門戶上以穰毒氣

按宗則字文度常以五月五日雞未鳴時採艾見似人處攬而取之用灸有驗師曠占曰歲多病則艾先生

是日競渡採雜藥

按五月五日競渡俗為屈原投汨羅日傷其死故並命舟楫以拯之舸舟取其輕利謂之飛鳧一自以為水軍一自以為水馬州將及土人悉臨水而觀之邯



鄆淳曹娥碑云五月五日時迎伍君逆濤而上為水  
所淹斯又東吳之俗事在子胥不關屈平也越地傳  
云起於越王勾踐不可詳矣是日競採雜藥夏小正  
此月蓄藥以蠲除毒氣

以五綵絲繫臂名曰辟兵令人不病瘟又有條達等織  
組雜物以相贈遺取鵲鵲教之語

按仲夏繭始出婦人染練咸有作務日月星辰鳥獸  
之狀文繡金縷貢獻所尊一名長命縷一名續命縷

一名辟兵繒一名五色絲一名朱索名擬甚多青赤白黑以為四方黃為中央襍方綴於胸前以示婦人計功也此月鵠鵒子毛羽新成俗好登巢取養之以教其語也

夏至節日食糴

周處謂為角黍人並以新竹為筒糴練葉插五綵繫臂謂為長命縷

是日取菊為灰以止小麥蟲

按干寶變化論云朽稻為蜚朽麥為蚘蝶此其驗乎  
六月伏日並作湯餅名為辟惡

按魏氏春秋何晏以伏日食湯餅取巾拭汗面色皎  
然乃知非傳粉則伏日湯餅自魏已來有之

七月七日為牽牛織女聚會之夜

按戴德夏小正云是月織女東向蓋言星也春秋斗  
運樞云牽牛神名畧石氏星經云牽牛名天關佐助  
期云織女神名收陰史記天官書云是天帝外孫傳

玄擬天問云七月七日牽牛織女會天河此則其事也河鼓黃姑牽牛也皆語之轉

是夕人家婦女結綵縷穿七孔針或以金銀鍮石為針陳瓜果於庭中以乞巧有喜子網於瓜上則以為符應按世王傳曰竇后少小頭禿不為家人所齒七月七日夜人皆看織女獨不許后出有光照室為后之瑞七月十五日僧尼道俗悉營盆供諸佛

按孟蘭盆經云有七葉功德並幡花歌鼓果食送之

蓋由此也經云目連見其亡母在餓鬼中即鉢盛飯  
往餉其母食未入口化成火炭遂不得食目連大叫  
馳還白佛佛言汝母罪重非汝一人奈何當須十方  
衆僧威神之力至七月十五日當為七代父母厄難  
中者具百味五果以著盆中供養十方大德佛勅衆  
僧皆為施主祝願七代父母行禪定意然後受食是  
時目連母得脫一切餓鬼之苦目連白佛未來世佛  
弟子行孝順者亦應奉盂蘭盆供養佛言大善故後

人因此廣為華飾乃至刻木割竹飴蠟翦綵模花葉之形極工妙之巧

八月十四日民並以朱水點兒頭額名為天灸以厭疾又以錦綵為眼明囊遮相餉遺

按述征記云八月一日作五明囊盛取百艸頭露洗眼令眼明也續齊諧記云弘農鄧紹嘗以八月旦入華山採藥見一童子執五綵囊承栢葉上露皆如珠滿囊紹問用此何為答曰赤松先生取以明目言終

便失所在今世人八月旦作眼明袋此遺象也或以金薄為之遞相餉焉

九月九日四民並藉野飲宴

按杜公瞻云九月九日宴會未知起於何代然自漢至宋未改今北人亦重此節佩茱萸食餌飲菊花酒云令人長壽近代皆宴設於臺榭又續齊諧記云汝南桓景隨費長房遊學長房謂之曰九月九日汝南當有大災厄急令家人縫囊盛茱萸繫臂上登山飲

菊花酒此禍可消景如言舉家登山夕還見雞犬牛羊一時暴死長房聞之曰此可代也今世人九日登高飲酒婦人帶茱萸囊蓋始於此

十月朔日黍臠俗謂之黍歲首

未詳黍臠之義今北人此日設麻羹豆飯當為其始熟嘗新耳禰衡別傳云十月朔黃祖在艨艟上會設黍臠是也

仲冬之月采撷霜蕪菁葵等雜菜乾之並為鹹菹



有得其和者並作金釵色今南人作鹹菹以糯米熬搗為末并研胡麻汁和釀之石窄令熟菹既甜汁脆亦酸美其莖為金釵股醒酒所宜也

十二月八日為臘日諺言臘鼓鳴春草生村人並擊細腰鼓戴胡頭及作金剛力士以逐疫

按禮記云儺人所以逐厲鬼也呂氏春秋季冬紀注云今人臘前一日擊鼓驅疫謂之逐除晉陽秋王平子在荊州以軍圍逐除以閭故也玄中記顓頊氏三

子俱亡處人宮室善驚小兒漢世以五營千騎自端  
門傳炬送疫棄洛水中故東京賦云卒歲大儺毆除  
羣厲方相秉鉞巫覡操茆侖子萬童丹首玄製桃弧  
棘矢所發無臬宣城記云洪矩吳時作廬陵郡載土  
船頭逐除人就矩乞矩指船頭云無所載土耳小說  
孫興公常着戲頭與逐除人共至桓宣武家宣武覺  
其應對不凡推問乃驗也金剛力士世謂佛家之神  
案河圖玉版云天立四極有金剛力士兵長三十丈

此則其義

其日並以豚酒祭竈神

按禮器竈者老婦之祭尊於瓶盛於盆言以瓶為罇  
盆盛饌也許慎五經異義云顓頊有子曰黎為祝融  
火正祝融為竈神姓蘇名吉利婦姓王名搏頰漢陰  
子方臘日見竈神以黃犬祭之謂為黃羊陰氏世蒙  
其福俗人競尚以此故也

歲前又為藏彊之戲

按周處風土記曰醇以告蜡竭恭敬于明祀乃有藏  
彊臘日之後叟姬各隨其儕為藏彊分二曹以校勝  
負辛氏三秦記以為鈎弋夫人所起周處成公綏並  
作彊字藝經庾闡則作鈎字其事同也俗云此戲令  
人生離有禁忌之家則廢而不修

歲暮家家具有簌詣宿歲之位以迎新年相聚酣飲留  
宿歲飯至新年十二日則棄之街衢以為去故納新也

乾淳歲時記周密

元正

朝廷元日冬至行大朝會儀則百官冠冕朝服備法駕  
設黃麾仗三千三百五十人

視東京已減三之一

用太常雅樂宮

架登歌太子上公親王宰執並赴紫宸殿立班進酒上  
千萬歲壽上公致辭樞密宣荅及諸國使人及諸州入  
獻朝賀然後奏樂進酒賜宴此禮不能常行每歲禁中  
止是以三茅鐘鳴駕興上服幘頭玉帶靴袍先詣福寧

殿龍墀及聖堂炷香

用臘沉腦子

次至天章閣祖宗神御殿

行酌獻禮次詣東朝奉賀復回福寧殿受皇后太子皇

子公主貴妃至郡夫人內官大內已下賀賀畢駕始過

大慶殿御史臺閣門分引文武百僚追班稱賀大起居

十六拜致辭上壽樞密宣答禮畢放仗是日後苑排辦

御筵于清燕殿用挿食盤架午後修內司排辦晚筵于

慶瑞殿用烟火進市食賞燈並如元夕

立春

前一日臨安府進大春牛設之福寧殿庭及駕臨幸內

宮皆用五色絲綵杖鞭牛御藥院例取牛睛以充眼藥

餘屬直閣婆

號管人  
都行首

掌管預造小春牛數十飾綵旛雪

柳分送殿閣巨璫各隨以金銀錢彩段為酌是日賜百

官春旛勝宰執親王以金餘以金裹銀及羅帛為之係

文思院造進各垂于幞頭之左入謝後苑辦造春盤供

進及分賜貴邸宰臣巨璫翠縷紅絲金雞玉燕備極精

巧每盤直萬錢學士院撰進春帖子帝后貴妃夫人諸

間各有定式絳羅金縷華棊可觀臨安府亦鞭春開宴而邸第饋遺則多效內庭焉

元夕

禁中自去歲九月賞菊燈之後迤邐試燈謂之預賞一入新正燈火日盛皆修內司諸璫分主之競出新意年異而歲不同往往于復古膺福清燕明華等殿張掛及宣德門梅堂三間臺等處臨時取旨起立鰲山燈之品極多見後燈品每以蘇燈為最圍片大者徑三四尺皆五色



琉璃所成山水人物花竹翎毛種種奇妙儼然着色便面也其後福州所進則純用白玉晃耀奪目如清水玉壺爽徹心目近歲新安所進益奇雖圈骨悉皆琉璃所為號無骨燈禁中嘗令作琉璃燈山其高五丈人物皆用機關活動結大綵樓貯之又于殿堂梁棟窻戶間為涌壁作諸色故事龍鳳喫水蜿蜒如生遂為諸燈之冠前後設玉柵簾寶光花影不可正視仙韶內人迭奏新曲聲聞人間殿上鋪連五色琉璃閣皆毬文戲龍百花

小窓間垂小水晶簾流蘇寶帶交映璀璨中設御座恍然如在廣寒清虛府中也至二鼓上乘小輦幸宣德門觀鰲山擎輦者皆倒行以便觀賞金爐腦麝如祥雲五色熒煌炫轉照耀天地山燈凡數千百種極其新巧怪怪奇奇無所不有中以五色玉柵簇成皇帝萬歲四大字其上伶官奏樂稱念口號致語其下為大露臺百藝羣工競呈奇技內人及小黃門百餘皆巾裹翠蛾傲街坊清樂傀儡繚繞于燈月之下既而取旨宣喚市井舞

隊及市食盤架先是京尹預擇華潔及善歌呌者謹伺于外至是歌呼競入既經進御妃嬪內人而下亦爭買之皆數倍得直金珠磊落有一夕而至富者宮漏既深始宣放烟火百餘架于是樂聲四起燭影縱橫而駕始還矣大率倣宣和盛際愈加精妙特無登樓賜宴之事人間不能詳知耳

都城自舊歲冬孟駕回則已有乘肩小女鼓吹舞綰者數十隊以供貴邸豪家幕次之翫而天街茶肆漸已羅

列燈毬等求售謂之燈市自此以後每夕皆然三橋等處客邸最盛舞者往來最多每夕樓燈初上則簫鼓已紛然自獻于下酒邊一笑所費殊不多往往至四鼓乃還自此日盛一日姜白石有詩云燈已闌珊月氣寒舞兒往往夜深還只因不盡婆娑意更向街心弄影看又云南陌東城盡舞兒畫金刺繡滿羅衣也知愛惜春遊夜舞落銀蟾不肯歸吳夢窓玉樓春云茸茸狸帽遮梅額金蟬羅剪胡衫窄乘肩爭看小腰身倦態強隨閒鼓

笛問稱家在城東陌欲買千金應不惜歸來困頓啼春  
眠猶夢婆娑斜起拍深得其意態也至節後漸有大隊  
如四國朝僊偶杵歌之類日趨于盛其多至數十百隊  
天府每夕差官點視各給錢酒油燭多寡有差且使之  
南至昇陽宮支酒燭北至春風樓支錢終夕天街鼓吹  
不絕都民士女羅綺如雲蓋無夕不然也至五夜則京  
尹乘小提轎諸舞隊次第簇擁前後連亘十餘里錦繡  
填委簫鼓振作耳目不假給吏魁以大囊貯楮券凡遇

小經紀人必搞數十謂之買市至有點者以小盤貯梨  
藕數片騰身迭出于稠人之中支請官錢數次者亦不  
禁也李賀房詩云斜陽盡處蕩輕烟輦路東風入管絃  
五夜好春隨步暖一年明月打頭圓香塵掠粉翻羅帶  
密炬籠綃關玉鈿人影漸稀花露冷踏歌吹度曉雲邊  
京尹幕次例占市西坊繁鬧之地簣燭糝盆照耀如晝  
其前列荷校囚數人大書犯由云某人為不合搶撲釵  
環挨搪婦女繼而行遣一二謂之裝燈其實皆三獄罪

因姑借此以警姦民分委府僚巡警風燭及命轄房使  
臣等分任地方以緝姦盜三獄亦張燈建淨獄道場多  
裝獄戶故事及陳列獄具邸第好事者如清河張府蔣  
御藥家間設雅戲烟火花邊水際燈燭粲然遊人士女  
縱觀則迎門酌酒而去又有幽坊靜巷好事之家多設  
五色琉璃泡燈更自雅潔靚粧笑語望之如神仙白石  
詩云沙河雲合無行處惆悵來遊路已迷却入靜坊燈  
火空門門相似列蛾眉又云遊人歸後天街靜坊陌人

家未閉門簾裏垂燈照樽俎坐中嬉笑覺春溫或戲于  
小樓以人為大影戲兒童謹呼終夕不絕此類不可遽  
數也西湖諸寺惟天竺張燈最盛往往有宮禁所賜貴  
璫所遺者都人好奇亦往觀焉白石詩云珠絡琉璃到  
地垂鳳頭銜帶玉交枝君王不賞無人進天竺堂深夜  
雨時

元夕節物婦人皆帶珠翠鬧蛾玉梅雪柳菩提葉燈毬  
銷金合蟬貉袖頂帕而衣多尚白蓋月下所宜也游手



浮浪輩則以白紙為大蟬謂之夜蛾又以棗肉炭屑為  
丸繫以鐵絲然之名火楊梅節食所尚則乳糖丸子鮓  
餛飩科斗粉豉湯水晶膾韭餅及南北珍果并皂兒糕宜  
利少澄沙糰子滴酥鮑螺酪麵玉消膏琥珀餠輕餠生  
熟灌藕諸色瓏璪蜜煎蜜裹糖瓜薑煎七寶薑豉十般  
糖之類皆用鏤鑰裝花盤架車兒簇插飛蛾紅燈綠盞  
歌叫喧闐幕次往往使之吟叫倍酌其直白石亦有詩  
云貴客鈎簾看御街市中珍品一時來簾前花架無行

路不得金錢不肯回競以金盤鈿合簇釘饋遺謂之市  
食合兒翠簾銷幕絳燭紗籠遍呈舞隊密擁歌姬脆管  
清吭新聲交奏戲具粉嬰鬻歌售藝者紛然而集至夜  
闌則有持小燈照路拾遺者謂之掃街遺鈿墮珥往往  
得之亦東都遺風也

舞隊

大小全棚傀儡

查查鬼

夫查

李大口

一字

賀豐年

長瓢飲長頭

兎吉兎毛  
大伯

吃遂

大憨兒

麤姐

麻婆子

快活三郎

黃金杏

瞎判官

快活三娘

沈承務

一臉膜

貓兒相公

洞公嘴

細姐

河東子

黑遂

玉缺兒

交椅

夾捧

屏風

男女竹馬

男女杵歌

大小斫刀鮑老

交衮鮑老

子弟清音

女童清音

諸國獻寶

六國朝

四國朝

穿心國入貢

孫武子教女兵

過雲社

緋綠社

蠻女

鳳阮嵇琴

撲蝴蝶

回陽丹

大藥

瓦鼓

焦鋌架兒

喬三教

喬迎酒

喬親事

喬樂神

馬明王

喬捉蛇

喬學堂

喬宅眷

喬像生

喬師娘

獨自喬

地仙

早划船

教象

裝態

村田樂

鼓板

踏踎

撲旗

抱鑼裝鬼

獅豹蠻牌

十齊郎

耍和尚

劉袞

散錢行

貨郎

打嬌惜

其品甚夥不可悉數首飾衣裝相矜侈靡珠翠錦綺眩  
耀華麗如傀儡杵歌竹馬之類多至十餘隊二十三  
兩日國忌禁樂則有裝宅眷籠燈前引珠翠盛飾少年  
尾其後訶殿而來卒然遇之不辨真偽及為喬經紀人  
如賣蜂糖餅小八塊風子賣字本虔婆賣旗兒之類以  
資一笑者尤多也

燈品

燈品至多蘇福為冠新安晚出精妙絕倫所謂無骨燈者其法用絹囊貯粟為胎因之燒綴及成去粟則混然琉璃毬也景物奇巧前無其比又為大屏灌水轉機百物活動趙忠惠守吳日嘗命製春雨堂五大間左為汴京御樓右為武林燈市歌舞雜藝纖悉曲盡凡用千工外此有鮑燈則移鏤犀珀玳瑁以飾之珠子燈則以五色珠為網下垂流蘇或為龍船鳳輦樓臺故事羊皮燈



則鏤鏤精巧五色粧染如影戲之法羅帛燈之類尤多  
或為百花或細眼間以紅白號萬眼羅者此種最奇外  
此有五色蠟紙菩提葉若沙戲影燈馬騎人物旋轉如  
飛又有深閨巧娃剪紙而成尤為精妙又有絹燈剪寫  
詩詞時寓譏笑及畫人物藏頭隱語及舊京諠語戲弄  
行人有貴邸嘗出新意以細竹絲為之加以綵飾疎明  
可愛穆陵喜之令製百盞期限既迫勢難卒成而內苑  
諸璫耻于不自已出思所以勝之遂以黃草布剪縷加

之點染與竹無異凡兩日百盞已進御矣

挑菜

二月一日謂之中和節唐人最重今惟作假及進單羅御服百官服單羅公裳而已二日宮人排辦挑菜御宴先是預備朱綠花斛下以羅帛作小卷書品目于上繫以紅絲上植生菜薺花諸品俟宴酌樂作自中殿以次各以金籠挑之后妃皇子貴主婕妤及都知等皆有賞無罰以次每斛十號五紅字為賞五黑字為罰上賞則

成號真珠玉杯金器北珠篋環珠翠領抹次亦鈹銀酒  
器冠釵翠花段帛龍涎御扇筆墨官窰定器之類罰則  
舞唱吟詩念佛飲冷水吃生薑之類用此以資戲笑王  
宮貴邸亦多倣之

進茶

仲秋上旬福建漕司進第一綱茶名北苑試新方寸小  
夸進御止百夸護以黃羅軟盞藉以青簞裹以黃羅夾  
複臣封朱印外用朱漆小匣鍍金鎖又以細竹絲織笈

貯之凡數重此乃雀舌水芽所造一夸之直四十萬僅  
可供數甌之啜耳或以一二賜外郎則以生線分解轉  
遺好事以為奇玩茶之初進御也翰林司例有品嘗之  
費皆漕司邸吏賂之間不滿欲則入鹽少許茗花為之  
散漫而味亦漓矣禁中大慶會則用大鍍金甌以五色  
韻果簇釘龍鳳謂之繡茶不過悅目亦有專其工者外  
人罕知因附見于此

賞花

禁中賞花非一先期後苑及修內司分任排辦凡諸苑  
亭榭花木粧點一新錦簾銷幕飛梭繡毬以至茵褥設  
放器玩盆窠珍禽異物各務奇麗又命小璫內司列肆  
關撲珠翠冠朵篋環繡段畫領花扇官窑定器孩兒戲  
具關竿龍船等物及有賣買菓木酒食餅餌蔬茹之類  
莫不備具悉倣西湖景物起自梅堂賞梅芳春堂賞杏  
花桃源觀桃漿錦堂金林檎照粧亭海棠蘭亭修禊至  
于鍾美堂大花為極盛堂前三面皆以花石為臺三層

各植名品標以象牌覆以碧幕臺後分植玉繡毬數百株儼如鏤玉屏堂內左右各列三層雕花彩檻護以彩色牡丹畫衣間列碾玉水晶金壺及大食玻璃官窰等瓶各簪奇品如姚魏御衣黃照殿紅之類幾千朶別以銀箔間貼大斛分種數十百窰分列四面至于梁棟窓戶間亦以湘筒貯花鱗次簇挿何翅萬朶堂中設牡丹紅錦地茵自中殿妃嬪以至內官各賜翠葉牡丹分枝鋪翠牡丹御書畫扇龍涎金合之類有差下至伶官樂

部應奉等人亦需恩賜謂之隨花賞或天顏悅懌謝恩  
賜予多至數次至春暮則稽古堂會瀛堂賞瓊花靜侶  
亭紫笑淨香亭采蘭挑筍則春事已在綠陰芳草間矣  
大抵內宴賞初坐再坐挿金盤架者謂之排當否則但  
謂之進酒

### 放春

蔣苑使有小圃不滿二畝而花木匝亭榭奇巧春時  
悉以所有書畫玩器冠花器弄之物羅列滿前戲效關

撲有珠翠冠僅大如錢者。鬧竿花籃之類，悉皆鏤絲玉金為之，極其精妙。且立標竿射垛及鞦韆、梭門、鬪雞、蹴鞠諸戲，事以娛遊客。衣冠士女至者，招邀杯酒，往往過禁烟，乃已。蓋敦禁苑具體而微者也。

社會

二月八日為桐川張王生辰，霍山行宮朝拜極盛。百戲

競集如緋綠社

雜劇

齊雲社

蹴毬

遏雲社

唱賺

同文社

要詞

角觝

社

相撲

清音社

清樂

錦標社

射弩

錦體社

花綢

英略社

使棒

雄辯社



小翠錦社

行院

繪革社

影戲

淨髮社

梳剃

律華社

吟叫

雲機社

撮弄

而七寶騰馬二會為最王山寶帶尺璧寸珠璀璨奪目而天驥龍媒絨韉寶轡競賞神駿好奇者至剪毛為花草人物厨行果局窮極肴核之珍有所謂意思作者悲以通草羅帛雕飾為樓臺故事之類飾以珠翠極其精緻一盤至直數萬然皆浮靡無用之物不過資一玩耳奇禽則紅鸚白雀水族則銀蟹金龜高麗華山之奇松交廣海嶠之異卉不可縷數莫非動心駭目之觀也若

三月三日殿司真武會三月二十八日東嶽生辰社會之盛大率類此不暇贅陳

祭掃

清明前三日為寒食節都城人家皆插柳滿簷雖小坊幽曲亦青青可愛大家則加棗餠于柳上然多取之湖隄有詩云莫把青青都折盡明朝更有出城人朝廷遣臺臣中使宮人車馬朝響諸陵原廟薦獻用麥糕稠飴而人家上塚者多用棗餠薑豉南北兩山之間車馬紛

然而野祭者尤多如大昭慶九曲等處婦人淡裝素衣  
提携兒女酒壺肴壘村店山家分餽遊息至暮則花柳  
土宜隨車而歸若王津富景御園包家山之桃關東青  
門之菜市東西馬塍尼菴道院尋芳討勝極意縱遊隨  
處各有買賣趕趁等人野果山花別有幽趣蓋輦下驕  
民無日不在春風歌舞而游手末技為尤盛也

浴佛

四月八為佛誕日諸寺院各有浴佛會僧尼輩競以小

盆貯銅像浸以糖水覆以花棚銃鉞交迎遍往邸第富  
室以小杓澆灌以求施利是日西湖作放生會舟楫盛  
多略如春時小舟競賣龜魚螺蚌放生

迎新

戶部點檢所十三酒庫例于四月初開煮九月初開清  
先是提領所呈樣品嘗然後迎引至諸所隸官府而散  
每庫各用疋布書庫名高品以長竿懸之謂之布牌以  
木牀鐵擎為仙佛鬼神之類駕空飛動謂之臺閣雜劇

百戲諸藝之外又為漁父習閑竹馬出獵八仙故事及  
命妓家女使裹頭花巾為酒家保及有花裹五熟盤架  
放生籠養等各庫爭為新好庫妓之琤琤者皆珠翠盛  
飾銷金紅背乘繡韉寶勒駿騎各有皂衣黃號私身數  
對訶導于前羅扇衣笈浮浪閒客隨逐于後少年狎客  
往往簇釘持盃爭勸馬首金錢綵段需及興臺都人習  
以為常不為怪笑所經之地高樓邃閣繡幕如雲累足  
駢肩真所謂萬人海也

端午

先期學士院供帖子如春日禁中排當例用朔日謂之  
端一或傳舊京亦然挿食盤架設天師艾虎意思山子  
數十座五色蒲絲百草霜以大合三層飾以珠翠葵榴  
艾花蜈蚣蛇蝎蜥蜴等謂之毒蟲及作糖霜韻果糖蜜  
巧粽極其精巧又以大金瓶數十遍挿葵榴梔子花環  
繞殿閣及分賜后妃諸閣大璫近侍翠葉五色葵榴金  
絲翠扇真珠百索釵符經筒香囊軟香龍涎佩帶及紫

練白葛紅蕉之類大臣貴邸均被細葛香羅蒲絲艾朶  
彩團巧粽之賜而外邸節物大率效尤馬巧粽之品不  
一至結為樓臺舫輅又以青羅作赤口白舌帖子與艾  
人並懸門楣以為禳禳道宮法院多送佩帶符篆而市  
人門首各設大盆雜植艾蒲葵花上掛五色紙錢排釘  
果粽雖貧者亦然湖中是日遊舫亦盛蓋迤邐炎暑晏  
遊漸稀故也俗以此日為馬本命凡御廐邸第上乘悉  
用五綵為鬃尾之飾奇鞦寶轡充滿道途亦可觀玩也

禁中納涼

禁中避暑多御復古選德等殿及翠寒堂納涼長松修竹濃翠蔽日層巒竒岫靜窈縈深寒瀑飛空下注大池可十畝池中紅白菡萏萬柄蓋園丁以瓦盎別種分列水底時易新者庶幾美觀又置茉莉素馨建蘭麝香藤朱槿玉桂紅蕉闌婆薹蔔等南花數百盆于廣庭鼓以風輪清芬滿殿御筯兩旁各設金盤數十架積雪如山紗厨後先皆懸掛伽蘭木真蠟龍涎等香珠百餘簇漿



金盃珍果玉壺初不知人間有塵暑也聞洪景廬學士  
嘗賜對于翠寒堂當三伏中體粟戰慄不可久立上問  
故笑遣中貴人以北綾半臂賜之則境界可想見矣

### 都人避暑

六月六日顯應觀崔府君誕辰自東都時廟食已盛是  
日都人士女駢集炷香已而登舟汎湖為避暑之遊時  
物則新荔枝軍庭李二果產闡奉化項里之楊梅聚景  
園之秀蓮新藕密筒甜瓜椒核枇杷紫菱碧莢來禽金

桃蜜漬昌元梅木瓜豆兒水荔枝膏金橘水糲麻飲芥  
辣白醪涼水冰雪爽口之物關撲香囊畫扇涎花珠佩  
而茉莉為最盛初出之時其價甚穹婦人簇帶多至七  
插所直數十券不過供一餉之娛耳蓋入夏則遊船不  
復入裏湖多占蒲深柳密寬涼之地披襟釣水月上始  
還或好事者則敞大舫設蘄簟高枕取涼櫛髮快浴惟  
取適意或留宿湖心竟夕而歸

乞巧

立秋日都人戴楸葉飲秋水亦小豆七夕節物多尚果  
食蒿雞及泥孩兒號摩睺羅有極精巧飾以金珠者其  
直不貲併以蠟印鳬鴈水禽之類浮之水上婦人女子  
夜對月穿鍼餽飮盃盤飲酒為樂謂之乞巧及以小蜘蛛  
貯合內以候結網之疎密為得巧之多少小兒女多  
衣荷葉半臂手持荷葉效顰摩睺羅大抵皆原舊俗也  
七夕前修內司例進摩睺羅十卓每卓三十枚大者至  
高三尺或用象牙雕鏤或用龍涎佛手香製造悉用鏤

金珠翠衣帽金錢釵鈿佩環真珠頭鬚及手中所執戲具皆七寶為之各護以五色鏤金紗厨制閭貴臣及京府等處至有鑄金為貢者宮姬市娃冠花衣領皆以乞巧時物為飾焉

中元

七月十五日道家謂之中元節各有齋醮等會僧寺則于此日作盂蘭盆齋而人家亦以此日祀先例用新米新醬冥衣時果綵段麵基而茹素者幾十八九屠門為

之罷市焉

中秋

禁中是夕有賞月延桂排當如倚桂閣秋暉堂碧岑皆  
臨時取旨夜深天樂直徹人間御街如絨線蜜煎香鋪  
皆鋪設貨物誇多競好謂之歇眼燈燭華燦竟夕乃止  
此夕浙江放一點紅羊皮小水燈數十萬盞浮滿水面  
爛如繁星有足觀者或謂此乃江神所喜非徒事觀美  
也

觀潮

浙江之潮天下之偉觀也自既望以至十八日為最盛  
方其遠出海門僅如銀線既而漸近則玉城雪嶺際天  
而來大聲如雷霆震撼激射吞天沃日勢極雄豪楊誠  
齋詩云海濶銀為郭江橫玉繫腰者是也每歲京尹出  
浙江亭教閱水軍艨艟數百分列兩岸既而盡奔騰分  
合五陣之勢并有乘騎弄旗標槍舞刀于水面者如履  
平地倏爾黃烟四起人物略不相覩水爆轟震聲如崩

山烟消波靜則一舸無迹僅有敵舟為火所焚隨波而  
逝吳兒善泅者數百皆被髮丈身手持十幅大綵旗爭  
先鼓勇汴迎而上出沒于鯨波萬仞中騰身百變而旗  
尾略不需濕以此誇能而豪民貴宦爭賞銀綵江干上  
下十餘里間珠翠羅綺溢目車馬塞途飲食百物皆倍  
穹常時而僦賃看幕雖席地不容閒也禁中例觀潮于  
天開圖畫高臺下瞰如在指掌都民遙瞻黃繖雉扇于  
九霄之上真若簫臺蓬島也

重九

禁中例于八日作重九排當于慶瑞殿分列萬菊燦然  
眩眼且點菊燈略如元夕內人樂部亦有隨花賞如前  
賞花例蓋賞燈之宴權輿于此自是日盛矣或于清燕  
殿綴金亭賞橙橘遇郊祀歲則罷宴都人是日飲新酒  
汎萸簪菊且各以菊糕為饋以糖肉秫麩雜物為之上  
縷肉絲鴨餅綴以榴顆標以絲旗又作蠻王獅子于上  
及麋栗為屑合以蜂蜜印花脫餅以為果餌又以蘇子



微漬梅酒雜和蔗霜梨橙玉榴小顆名曰春蘭秋菊雨  
後新涼則已有炒銀杏梧桐子吟叫于市矣

開爐

是日御前供進夾羅御服臣僚服錦襖子夾公服授衣  
之意也自此御爐日設火至明年二月朔止皇后殿開  
爐節排當是月遣使朝陵如寒食儀都人亦出郊拜墓  
用絛毬褚衣之類

冬至

朝廷大朝會慶賀排當並如元正儀而都人最重一陽  
賀冬車馬皆華整鮮好五鼓已填擁雜還于九街婦人  
小兒服飾華炫往來如雲嶽祠城隍諸廟炷香者尤盛  
三日之內店肆皆罷市垂簾飲博謂之做節享先則以  
餽餽有冬餽餽年餽餽之諺貴家求奇一器凡十餘色  
謂之百味餽餽

賞雪

禁中賞雪多御明遠樓

禁中稱楠木樓

後苑進大小雪獅兒並

以金鈴綠縷為飾且作雪花雪燈雪山之類及滴酥為  
花及諸事件並以金盆盛進以供賞翫并造雜煎品味  
如春盤餽飮羊羔兒酒以賜餅于內藏庫支撥官券數  
百萬以犒諸軍及令臨安府分給貧民或皇后殿別自  
支犒而貴家富室亦各以錢米犒閭里之貧者

歲除

禁中以臘月二十四為小節夜三十日為大節夜呈女  
童驅儺裝六丁六甲六神之類大率如夢華所載後苑

修內司各進消夜果兒以大合簇釘凡百餘種如蜜煎  
珍果下至花餚箕豆以至玉杯寶器珠翠花朵犀象博  
戲之具銷金斗葉諸色戲弄之物無不備具皆極小巧  
又于其上作玉輅高至三四尺悉以金玉等為飾護以  
貼金龍鳳羅罩以奇侈求勝一合之費不啻中人十家  
之產止以資天顏一笑耳后妃諸閣又各進歲軸兒及  
珠翠百事吉利市袋兒小樣金銀器皿并隨年金錢一  
百二十文旋亦分賜親王貴邸宰臣巨璫至于爆仗有

為果子人物等類不一而殿司所進屏風外畫鍾馗捕鬼之類而內藏藥線一藝連百餘不絕簫鼓迎春雜人警唱而玉漏漸移金門已啓矣

歲晚節物

臘月賜宰執親王三衙從官內侍省官并外閫前宰執等臘藥係和劑局方造進及御藥院特旨製造銀合各一百兩以至五十兩三十兩各有差伏日賜暑藥亦同都下自十月以來朝天門內外競售錦裝新歷諸般大

小門神桃符鍾馗獬虎頭及金綵縷花春帖旂勝之類為市甚盛八日則寺院及人家用胡桃松子乳葷柿栗之類作粥謂之臘八粥醫家亦多合藥劑備以虎頭丹八神屠蘇貯以絳囊饋遺大家謂之臘藥至于餽歲盤合酒檐羊腔充斥道路二十四日謂之交年祀竈用花飴米餌及燒替代及作糖豆粥謂之口數市井迎儺以鑼鼓遍至人家乞求利市至除夜則比屋以五色錢紙酒果以迎送六神于門至夜黃燭糝盆紅映霄漢爆

竹鼓吹之聲喧鬧徹夜謂之聒廳小兒女終夕博戲不  
寐謂之守歲又明燈牀下謂之照虛耗及貼天行帖兒  
財門于楣祀先之禮則或昏或曉各有不同如飲屠蘇  
百事吉膠牙餠煖木賣慵等事率多東都之遺風焉守  
歲之詞雖多極難其選獨楊守齋一枝春最為近世所  
稱併書于此竹爆驚春競喧闐夜起千門簫鼓流蘇帳  
暖翠鼎緩騰香霧停杯未舉奈剛要送年新句應自賞  
歌字清圓未誇上林鶯語從他歲窮日暮縱閒愁怎減

劉郎風度屠蘇辦了  
迤邐柳忻梅妬  
宮壺未曉  
早驕馬  
繡車盈路  
還又把月夕花朝  
自今細數



輦下歲時記

闕名

大閱

正月戶部奏大閱天下貢物於都堂其日放朝宰相與百官皆赴戶部宴會一時特盛開元中曾以大閱一日貢物賜李林甫九州任土盡歸人臣之家國史書其事也

出宮女歌舞

先天初上御安福門觀燈大常作歌樂出宮女歌舞朝

士能文者為踏歌聲調入雲

鑽火

長安每歲諸陵當以寒食薦餚粥雞毬等又薦雷子車  
至清明尚食內園官小兒于殿前鑽火先得火者進上  
賜絹三尺金枕一口都人並在延興門看內人出城洒  
掃車馬喧闐新進士則于月燈閣置打毬之宴或賜宰  
臣以下醖醕酒即重醖酒也

鬼市輦

俗說務本坊西門是鬼市或風雨曛晦皆聞其喧聚之  
聲秋冬夜聞賣乾柴云是枯柴精也又或中秋望夜聞  
鬼吟六街鼓絕行人歇九衢茫茫空有月有和者云九  
衢生人何勞勞長安土盡槐根高

踏歌

先天初上御安福門觀燈令朝士能文者為踏歌聲調  
入雲

竈燈

都人至年夜請僧道看經備酒果送神帖竈馬於竈上  
以酒糟抹於竈門之上謂之醉司命夜於竈裏點燈謂  
之照虛耗

秦中歲時記 李淖

金吾杖爆前所引百司皆避爾雅云即封牛也此獸善抵觸故彫其首於竿上加龍虎節以油囊盛之而行進士杏園初宴謂之探花宴差少俊二人為探花使遍遊名園若它人先拆花二使皆被罰

二月二日曲江採菜士民遊觀極盛

太和八年放榜有無名子作對曰乞兒還有大通年二十三人梳杖全薛庶准前騎瘦馬范鄴依舊蓋藩甑

端午前兩日東市謂之扇市車馬特盛

進士下第當年七月復獻新文求拔解故曰槐花黃舉  
子忙王維重陽應制詩曰四海方無事三秋大有年無  
窮菊花節長咏栢梁篇

初冬納文書却謂之選門開人名在令史前謂之某家  
百家牀在判後却須粘在前謂之吏部四拗

長安四月已後自堂厨至百司厨通謂之櫻筍厨公餽  
之盛常日不同

歲除日進儺皆作鬼神狀內二老兒儺公儺母

寒食節內僕司車與諸軍使為繩橛之戲合車轍道兩  
頭打大橛張繩橛上高二尺許須緊榜定駕車盤轉碾  
輪於繩上過不失者勝落輪繩下者輸皆裝飾車牛賭  
物動以千計





玉燭寶典

闕名

正日

正月之朔是謂正日躬率妻孥潔祀祖禰

膏粥

正月十五日作膏粥以祀門戶

酺食

元日至日晦並為酺食度水士女悉湔裳酹酒於水湄  
以為度厄

畫卯

寒食城市多鬪雞卯之戲出古之豪家食稱畫卯今代  
猶染藍茜加雕鏤遞相餉遺

角黍

午日以菰葉裹黏米以象陰陽相包裹未分散又以絲  
絲繫臂

織女星

七夕設酒脯時果於庭祀河鼓織女言此二星神當會

守夜者咸懷私願

食餌

九日食餌飲菊花酒者其時黍稷並收以因黏米嘉味  
觸類嘗新遂成積習

上冬

十月曰上冬

下元

十月十五日為下元

臘蜡

臘者祭先祖蜡者報百神同日異祭也一曰周曰蜡漢改曰臘

四民月令 崔寔

臘酒

十月上辛命典饋清麴釀冬酒以供臘祀臘明日謂小  
歲進酒尊長修刺賀君師

上時

四月可種黍謂之上時

望杏

三月杏花盛可畱白沙輕土之田

冷節

齊人呼寒食為冷節

棗糕

寒食以麵為蒸餅樣團棗附之名曰棗糕

捕蠅虎

五月五日取蠅虎杵碎拌豆豉自踴躍可以擊蠅出淮  
南子

麴丸

七月七日作麴合藍丸及蜀漆丸暴經書及衣裳不蠹  
戴楸葉

京師立秋滿街賣楸葉婦女兒童皆剪成花樣戴之形  
製不一

薦黍糕

冬至之日薦黍糕先薦玄冥以及祖禰其進酒肴及謁  
賀君師耆老如正日

獻履襪

近古婦人常以冬至日獻履襪於舅姑踐長至之義也  
出女儀



千金月令 孫思邈

賜綵

唐制立春賜三省官綵勝各有差

宜春字

立春日貼宜春字于門

傳柑

上元夜登樓貴戚例有黃柑相遺謂之傳柑

祓除

上巳桃花水上招魂續鬼秉蘭草祓除不祥

踏青

三月三日上踏青鞋履

赤靈符

五月五日作赤靈符着心前辟兵

菖蒲

端午以菖蒲或縷或屑以泛酒

進湯餅

伏日進湯餅名為辟惡

孟蘭會

七月十五日營盆供寺為孟蘭會

登高

重陽之日必以肴酒登高眺遠為時讌之遊賞以暢秋  
志酒必採茱萸甘菊以泛之既醉而還


拜墳

十月朔都城士庶皆出城饗墳禁中車馬朝陵如寒食

節

藏彊

臘日以後吏嫗各隨其儕為藏彊分為二曹以較勝負



說郛卷六十九上